

書史會要

三

一

二

三

四

五

六

七

八

九

書史會要卷之六

南村處士陶宗儀九成著

宋

都汴梁

太祖趙氏諱匡胤涿州人任後周殿下都檢點受禪即帝位以英武之姿開文明之運嘗有所書詩數幅天下一統四大字處分手札楷書三行傳世人知寶愛子孫代以文藻昭回雲漢有自來矣

太宗諱炅太祖弟載橐弓矢垂意翰墨真造八法草入三昧行書無對飛白入神評者又謂行草可逼盛唐但短於風韻耳嘗出御府所藏歷代真蹟命

侍書王著臨搨刻版禁中世謂之淳化閣帖是也
真宗諱恒太宗子善書甚得晉人風度評者以謂妙
在全備八法

仁宗諱禎真宗第六子天德純粹無聲色畋游之好
平居時御翰墨特喜飛白體執道勁可入能品

英宗諱曙太宗曾孫濮安懿王子仁宗立為子善書
神宗諱頊英宗子厲精求治尤工筆札

哲宗諱煦神宗子元祐之治為盛翰墨亦佳

徽宗諱佶括宗弟萬幾之餘翰墨不倦行草正書筆
勢勁逸初學薛稷變其法度自號瘦金書要是意
度天成非可以陳迹求也

周恭肅王

元儼太宗第八子少竒穎寘嗜慾惟喜聚

書好為文辭頗善二王書工飛白

吳榮王

顥字仲明英宗次子天姿穎異尤嗜學好圖

書工飛白

益端獻王

頊英宗第四子資表秀拔眉宇如畫貫通

經傳留心翰墨飛白篆籀皆造其妙

冀王

惟吉字國祥太祖孫燕懿王德昭子好學喜屬

文雅善草隸飛白真宗嘗次為七卷御製序命藏

祕閣

慈聖光獻皇后曹氏

真定人周武惠王彬之孫仁宗

后性慈儉善飛白蓋習觀昭陵落筆得其奧妙是

以筆執飛動所書用慈壽宮寶識之

欽聖憲肅皇后向氏 河內人故宰相敏中曾孫神宗

后工行草

趙惟和 惟吉弟雅好學為詩頗清麗工筆札

趙允寧 字德之商恭靖王元份子性嗜學尤喜讀唐

史通知近朝典故工虞世南楷法

趙仲鸞 濞安懿王允讓孫官至常州防禦使喜翰墨

趙仲忽 字周臣宗室也能草書筆法園美

趙令穰 字大年宗室也游心經史戲弄翰墨尤工草

書嘗作小草如聚蚊蝱如撮鍼鐵筆道而法足觀

之使人目力茫然誠可喜也

趙士暎字明發宗室也少好學喜為文書師米芾

趙子澄字處度宗室也廉介脩潔流落巴峽四十年

善草隸

李煜字重光南唐主景第六子嗣位稱後主入朝封
違命侯改封隴西郡公卒贈太師封吳王少聰悟
喜讀書屬文工書畫其作大字不事筆卷帛而書
之皆能如意世謂撮襟書復喜作顫掣執人又目
其狀為金錯刀尤喜作行書落筆瘦硬而風神溢
出然乏姿媚或者以謂煜大字如截竹木小字如
聚鍼釘似非筆跡所為又謂筆跡不減柳誠懸其
亦善評者矣又謂善書有筆法五字擗押鉤格抵

用筆双鉤則點畫道勁而盡善謂之撥鐙書煜得此法復增二字曰導送方煜來歸時藝祖嘗曰煜雖有文只一翰林學士耳此亦英偉之氣有以蓋之故其言如此

徐鉉字鼎臣揚州廣陵人仕南唐吏部尚書隨李煜入朝官至左散騎常侍當太宗時直學士院典誥命稱得體留心隸書尤善篆與八分識者謂自李陽冰之後續篆法者惟鉉而已人跋其書以謂筆實而字畫勁亦似其文章至於篆籀氣質高古幾與陽冰並馳爭先又謂鉉書映日視之中心有一縷濃墨至屈折處亦然乃筆鋒直下不倒側故耳

嘗奉詔與句中正葛端王惟恭等同校定許慎說文行於世鉉自謂暮年方得蠅匾法識者然之

徐鉉字楚金鉉弟仕南唐內史舍人因鉉奉使入宋憂懼而卒鉉亦善篆書以許慎說文依四聲譜次為十卷目曰說文解字韻譜鉉序其首鉉又集通釋四十篇暢許氏之玄旨正陽冰之新義皆說文之羽翼也

宋綬字公垂趙州平棘人官至叅知政事謚宣獻作字尤為時所推右嘗為小字正書整整可觀真是黃庭經樂毅論一派之法國初稱能書者惟李建中與綬二人建中之字肥而重濁或為時輩譏評

至綬則無間言蓋其書富於法度雖清臞而不弱亦古人所難到也

宋敏求

字次道綬子官至龍圖閣直學士書法溫厚

清峻凡當時巨卿名碣必得敏求字方以為榮

李建中

字德中其先京兆人官至司封員外郎工部

郎中嘗為殿中丞掌西京留司御史臺至今謂之李西臺居洛中以林泉自娛喜篆籀草隸八分於真行尤精觀其字體初效王羲之而氣格不減徐浩當時士大夫得其書莫不爭藏以為楷法作科斗書郭忠恕汗簡集以獻頗見褒羨論者以謂尚有五代衰陋之氣蓋以其作字淳厚不飄逸致然

蔡襄

字君謨興化人官至端明殿學士謚忠惠博古尚氣節工字學大字鉅數尺小字如豪髮筆力位置大者不失結密小者不失寬綽至於科斗篆籀正隸飛白行草章草顛草靡不臻妙而尤長於行在前輩中自有一種風味筆甚勁而姿媚有餘自珍其書以謂有翔龍舞鳳之勢識者不以為過而復推為本朝第一也論者以謂真行簡劄今為第一正書為第二大字為第三草書為第四其確論歟

蔡京

字元長與襄同郡而晚出欲附名闕自謂為族弟擢進士第官至太師魯國公以罪徙死博通經

史揮灑篇翰手不停輟性尤嗜書初類沈傳師久之深得王羲之筆意自名一家評者謂其字嚴而不拘逸而不外規矩正書如冠劍大人議於廟堂之上行書如貴胄公子意氣赫奕光采射人大字冠絕古今鮮有儔匹襄書為本朝第一而京可與方駕

蔡卞字元度京之弟與兄同年第進士官至檢校少保謚文正高宗追貶單州團練使自少喜學書初為顏行筆執飄逸但圓熟未至故圭角稍露自成一家亦長於大字厚重結密如其為人

米芾字元章初居太原後為襄陽人芾從吳以母侍

宣仁后藩邸舊恩歷官至禮部員外郎知淮陽軍
博文尚古性好潔世號水滄遠世異俗每與人迂
人又名米顛偉岸不羈口無俗語頎然束帶一古
君子善屬文不蹈艱一字崇寧間除書畫兩學博
士頗厭士論又詔作黃庭小楷千文以進旋加褒
美大抵書倣王羲之篆宗史籀隸法師宜官晚年
出入規矩深得意外之旨自謂善書者只得一筆
我獨有四面識者然之當時名世之流評其人物
以謂文則清雄絕俗氣則邁往凌雲字則超妙入
神然異議者謂其字神鋒太峻有如強弩射三十
里又如仲由未見孔子時風氣其為論或如此且

類多行書世亦罕及

蘇洵

字明允號老泉眉州人官至祕書省校書郎贈光祿寺丞後生望風內謁世稱老蘇先生工書法律不足氣韻有餘蜀人本不能書元祐間軾始以字畫名世其流雖出於晉唐其實已濫觴於洵之泉源矣

蘇軾

字子瞻號東坡居士洵之子官至端明翰林侍讀兩學士贈太師謚文忠高名大節照映今古又以翰墨妙天下少時規模徐浩筆圜而姿媚可喜中年喜臨顏真卿真行造次為之便欲窮本晚年乃喜李邕其豪勁多似之黃庭堅云東坡字字可

珍委頓人家蛛絲煤尾敗篋中數十年後當有併
金懸購者又云東坡書浙東西士大夫無不規模
頗有用意精到得其髣髴至於老年下筆沈著痛
快處遂無一筆可尋

蘇轍字子由號穎濱遺老軾之弟與兄同登進士科
由尚書右丞進門下侍郎謚文定書瘦勁可喜風
味絕高真可以兄弟東坡然特少雍容氣象當是
捉筆甚急而腕著絀故耳

黃庭堅字魯直號山谷道人洪州分寧人官至吏部
員外郎工正楷行草楷法妍媚自成一家草書尤
奇偉嘗自云余極喜顏魯公書時時意想為之筆

下似有風氣然不逮子瞻遠甚子瞻為余臨寫魯公十數緘乃如人家子弟雖老少不類然皆有祖父風骨又云嘗觀漢時石刻篆韻頗得楷法又云學書三十年初以周越為師故二十年抖擻俗氣不脫晚得蘇才翁子美書觀之乃得古人筆意其後又得張長史僧懷素高閑墨蹟乃窺筆法之妙於夔道舟中觀長年盪槳群丁撥櫂乃覺少進意之所到輒能用筆

石延年

字曼卿本幽州人其祖徙居宋城官至太子

中允祕閣校理跌宕不羈劇飲尚氣節文詞筆墨照映流輩正書入妙品尤喜題壁不擇緘筆而得

如意初沿汴而東繫舟泗水龜山下佛祠釋子以題殿榜為請乃為劇飲卷氈濡墨作方丈字人以為絕筆異時范仲淹誅之曰延年之筆顏筋柳骨散落人間實為神物其為名流推許如此

陸經

字子履越人官至集賢修撰善真行書前輩高

文必求經書故經之石刻殆徧天下然多作正書其典嚴以規矩自窘譬之推魯如叅厚重如勃不失為盛德君子

王子韶

字聖美浙右人官至祕書少監宿學醇儒知

古今方王安石以字書行於天下而子韶亦作字解二十卷大抵與安石之書相違背喜作正書至

於三過筆真可以挂萬鈞之重蓋其宗褚遂良顏真卿而莫年自變為一家耳

蘇舜欽

字子美號滄浪翁其先世居梓州後為開封

人官至集賢校理監進奏院少慷慨有大志工行草用筆沈著不凡端勁可愛評書之流謂入妙品當時殘章片簡傳播天下美其翰墨者有花發上林月澠淮水之語

蘇舜元

字才翁舜欽兄官至尚書度支員外郎為人

精悍任氣節歌詩亦豪健善篆籀亦工草字筆簡而法足書名與舜欽相後先蓋是下筆處同一閔鈕也

王安石字介甫號半山本撫州臨川人後居金陵官

至丞相封荆國公謚曰文追封舒王凡作字率多
淡墨疾書初未嘗畧經意惟達其辭而已然而使
積學者盡力莫能到評書者謂得晉宋人用筆法
美而不夭饒瘦而不枯瘁黃庭堅云荆公率意而
作本不求工而蕭散簡遠如高人勝士敝衣破履
行乎大車駟馬之間而目光已在牛背矣

劉正夫字德初三衢人登進士第官至少宰贈太師
謚文憲謇謇有大臣節平日喜學書多作行法好
與人論字所書字間有被旨承命為碑刻者以是
傳於世者絕少晚年間作逸字

周越字子發或字清臣淄州人官至主客郎中天聖慶曆間以書顯學者翁然宗之落筆剛勁沈著字字不妄作然而真行尤入妙草字入能也越之家昆季子姪無不能書者亦其所漸者然耶

杜衍字世昌越州山陰人擢進士甲科官至太師祁國公謚正獻廉潔自刻考其大節偉如也好翰墨至暮年以草書為得意喜與壻蘇舜欽論書韓琦嘗以詩謝其書云因書乞得字數幅伯英筋骨羲之虜其為當時所重如此史謂正書行草皆有法然以筆迹考之真行則非所長

于琮毗陵人善隸書學魏受禪表深得其行筆意

錢俶字文德吳越武肅王璠之孫文穆王元瓘之子
初元瓘有子曰佐嗣位是為忠獻未幾而俶特以
弟繼其昭穆入朝封秦王謚忠懿方浙右富庶登
豐之久上下無事惟以文藝相高故俶尤喜書善
顛草其翰旋盤結不減古人太宗評其書謂可入
神品

錢惟治字和世吳越廢王侗之長子官至檢校太師
善草隸尤好二王書嘗曰心能御手手能御筆則
法在其中矣家藏書帖圖書甚多太宗知之嘗謂
近臣曰錢俶兒姪多工草書因令翰林書學賀正
顯詣其第徧取視之曰諸錢皆效浙僧亞栖之迹

故筆軟弱獨治為工耳

錢惟演

字希聖忠懿王俶之子官至同中書平章事

謚文僖文辭清麗於書無所不讀家儲文籍侷祕府書帖亦平平

錢昱

字就之忠獻王佐之長子官至郢州團練使善

筆札工尺牘太宗嘗取觀而賞之

錢易

字希白吳越廢王侑之子俶歸朝群從悉補官

易與兄昆不見錄遂刻志讀書舉進士官至左司郎中翰林學士倬直未滿卒善尋丈大字及行草

錢昆

字裕之易之兄舉進士官至右諫議大夫以祕

書監老子家能詩善草隸書

錢勰

字穆父易之孫風骨明秀如圖畫中人生五歲

日誦千言工正草書正書師歐陽率更草書筆執
字體深造王大令閩域評者以謂可入能品

錢儂

字智仁文穆王元瓘養子建隆初領彰武節度

加使相性簡儉書畫皆入能品

章得象

字希言世居泉州高祖仕閩遂家浦城官至

鎮安軍節度使同平章事封郇國公謚文簡善正

草篆書晚年逾妙一以魏晉諸賢為則楷法殊類

王逸少然篆則不若真草也

章友直

字伯益文簡公得象族子公嘗欲以郊恩奏

補舜不願嘉祐中詔與楊南仲篆石經於太學除

將作主簿亦固辭友直既以此書名世故家人女子亦莫不知筆法咄咄逼真說者云自李斯篆法之亡而得一李陽冰陽冰之後得一徐鉉而友直在鉉之門其猶游夏云米芾評其書云友直書如宮女插花嬪嬙對鏡自有一般態度繼其人者誰歟襄陽米芾也

章惇

字子厚建州浦城人父俞徙蘇州官至尚書左僕射封申國公作書意象高古莫年一以魏晉諸賢為則此其正書殊類王逸少

楊南仲

不知何許人工篆書嘉祐中嘗與章友直篆石經於國子監甚有法度

王著字知微自言唐相石泉公方慶之後世家京兆渭南祖賁入蜀遂為成都人仕蜀為主簿入朝累遷翰林侍書加殿中侍御史善正書筆迹甚媚頗有家法太宗嘗從學書黃庭堅以謂著用筆圓熟亦不易得如富貴人家子非無福氣但病在韻耳著終侍書而不加學士之名蓋惜之也別有翰林學士王著自是一人

勾中正

字德元

坦一作然

益州華陽人仕蜀為泰武軍節

度掌書記入朝官至屯田郎中精於字學古文篆隸行草無不工太宗召對訪以書法擢任三館楷法極可觀

勾希仲 字衮臣中正子以進士起家官至光祿卿通

訓詁工篆隸能傳其父學

孫思皓

皓一作陵國初孫妃弟學歐陽率更書甚得體

李居簡

官至贊善大夫直御書院善草書凡草章小

草點畫皆有法太宗甚愛之

王嗣宗

字希阮汾州人官至檢校太傅謚景莊工習

草書而不能精

秦觀

字少游一字太虛號淮海居士揚州高郵人官

至國史院編脩官淹該經術書法有東晉風度

張耒

字文潛楚州淮陰人登進士第官至太常少卿

坡門四君子之一人文名滿天下而草書飄逸

可觀

郭忠恕

字恕先雒陽人仕周為博士入朝太宗素知

其名召為國子監主簿能屬文工篆隸而楷法尤

精字書忽廢幾於中絕求其如忠恕小楷不可得

李宗諤

字昌武深州饒陽人七歲能屬文以隸書著

名而不免於重濁故歐陽脩嘗曰書之肥者譬如

厚皮饅頭食之未必不佳而世命之為俗物矣此

亦有所激而云耳

張維

蜀人始為沙門後反初尤善王書絕得懷素之

骨王嗣宗薦之召試御書院維自負其能入院視

諸人書不覺微哂衆怒排之止得隸祕閣為楷書

不就景德末書鄭州開元寺新塔碑真一時絕也

鄭文寶

江表人官至工部郎中在江南時師徐鉉小

篆嘗篆干文以示鉉不出一中指甲鉉嘗曰篆難於小而易於大鄭子小篆李陽冰不及若大篆可兼尔

李無惑

同安人官翰林待詔工篆得撥鐙法益勁健

端妙世謂無惑書斯冰之後未見其比也

查道

字湛然歙州休寧人舉進士第官至右司郎中

事母以孝聞喜親筆硯始習篆患其體執弱有教以撥鐙法仍双鉤用筆經半年始習熟而篆體勁直甚佳

王熙古

熙一作希官翰林待詔工篆亦得撥鐙法而所書

為一時之絕

高紳

申革

葛湍

皆江東人皆為侍書皆善篆與

李無惑同時而弗能及也

王廣徽

字才叔大名成安人官至龍圖閣直學士小有才而善附會師宋綬作小字有法英宗嘗令書

欽明殿屏

徽一
洲

王臨

字大觀廣徽弟官至戶部副使負才氣議論不阿小字師宋綬大字法石延年魁梧擁腫乃以筆力豪壯為主然獨少古意耳

王壽卿

字魯翁陳留人祖擇之之外甥工篆得李陽冰筆意黃庭堅亟稱其書法云非章友直輩所能

管攝朝廷召至京師使篆字說辭以與王氏之學
異後以命李孝揚而壽卿終身布衣

陳晞

畢仲詢

李孝揚

俱工篆與王壽卿同時而

不及也

文勛字安國不知何許人官至太府寺丞善論難劇
談其篆畫方嚴勁正未嘗妄作一筆蘇軾銘勛字
云世人篆字隸體不除如浙人語終老帶吳安國
用筆意在隸前汲冢曾壁周鼓秦山

文彥博

字寬夫汾州介休人官至左僕射封潞國公

謚忠烈工書黃庭堅云余嘗謂潞公云公書極似
蘇靈芝公曰靈芝墨猪耳蓋不肯與靈芝爭長今

觀到洛為兒子赴許昌帖筆執清勁真不愧古人
韓琦字稚圭相州安陽人舉進士官至右僕射封魏
國公謚忠獻後贈魏郡王工正書師顏魯公而頗
露芒角

張次立官至殿中丞嘉祐中詔同篆國子石經

陳堯佐字希元其先河朔人後徙閩中官至太子太
師致仕謚文惠少好學善古隸自成一家雖點畫
肥重而筆力端勁老猶不衰能為方丈大字謂之
堆墨八分凡天下名山勝處碑刻題榜多公親迹
世或效之而莫能及也

陳堯咨字嘉謨堯佐弟官至知天雄軍贈太尉謚康

蕭工隸書

王顧與陳堯佐同時善隸書

楊岐善隸書

林伯脩莆田人善大字

胡恢金陵人官至華州推官博物強記善篆隸坐法

失官十餘年時韓魏公琦當國恢獻詩自達公深憐之令篆國子監石經因得復官

歐陽脩字永叔號六一居士吉州永豐人舉進士官

至叅知政事贈太子太師謚文忠幼穎悟過人讀書輒成誦家貧至以荻畫地學書好古嗜學凡周漢以降金石遺文斷編殘簡一切掇拾研稽異同謂之集古錄因此得古人筆意遺墨流傳道勁可

愛人皆寶之

司馬光字君實號涑水先生陝州夏縣人官至右僕射贈太師封溫國公謚文正正書不甚善隸書極端勁似其為人黃庭堅嘗跋公書云司馬溫公天下士也所謂左準繩右規矩聲為律身為度者觀其書猶可想見其風采

范仲淹字希文其先邠州人後徙江南遂為蘇州吳縣人舉進士第官至叅知政事謚文正內剛外和性至孝好施予置義莊以贍族人泛愛樂善士多出其門下善書得樂毅論筆意清勁中有法度但少肉耳

楊億字大年建州浦城人七歲能屬文太宗召試下

筆立成即授秘書省正字官至翰林學士謚曰文

工小楷

王伯忠近臣也善行書 **蔡环**官至尚書郎善行書

唐異其處士也善書世稱與李建中相為左右

林逋字君復杭州錢唐隱居不仕謚和靖先生善

行書筆意殊類李建中而清勁處尤妙

唐詢字彥猷杭州錢唐官至右諫議大夫讀書好

古尤精翰墨歐陽詢得其髣髴

唐詔字彥範詢之弟文章氣格高簡疏秀亦善書

唐垌字林夫詢之子熙寧間附王安石官同知諫院

學書知古人筆意少所許可甚愛蘇軾書

李隲

字顯夫成都人官至朝散大夫以能書名得真

行草三昧而真尤勝蘇軾嘗師之

李時雍

字致堯號適齋隲之子官至殿中丞工書崇

寧間與米芾同為書學博士嘗對御書跨鰲二字
字方及半宮人以花簪之不覺滿頭於是能聲高
壓米芾又嘗以書外國敕以絳紗封臂非被旨不
許輒書能以襟袖濡墨走筆作大字當時士大夫
碑記多時雍父子之手蓋其結字嫵媚雖乏道勁
然亦自成一家

李時敏

字致道時雍弟官至朝請郎克嗣家聲尤工

大字

邵競

字仲恭丹陽人官至直龍圖閣知蘇州工正行

字體清勁

高述

丹陽人

潘岐

齊安人皆有文藝故其風聲氣

格見於筆墨間時作蘇軾簡筆或能亂真遇至鑒則亦敗矣

文同

字與可梓州梓潼人世稱石室先生又自號笑

笑先生錦江道人舉進士稍遷太常博士集賢校理知陵州洋州湖州方口秀眉操韻高潔善篆隸行草飛白又善畫竹其筆法槎牙勁削如作枯木恠石時自有一種風味議者謂多縱健而少園媚

李公麟

字伯時號龍眠居士舒州人登進士第官至

中書門下後省刪定官御史檢法好古博雅多識
竒字自夏商以來鐘鼎尊彝皆能考定世次辨測
款識聞一妙品雖捐千金不惜兼綜覽法書故悟
古人用筆意作書有晉人風格清勁而妍麗

薛紹彭

字道祖長安人官至祕閣脩撰出為梓潼漕

自謂河東三鳳後人書名亞米芾符祐間號能書

江休復

字鄰幾開封陳留人官至尚書刑部郎中善

隸書官奉符日嘗至泰山頂視秦所刻石處云石
頑不可鐫鑿不知當時何以刻也其四面無草木
而野火不能及故能若此之久然風雨所剝其存

者纔此數十字而已可以知其嗜好也

葛蘊字叔忱能屬文尤長於詩又特善書或以淡墨塵紙戲為之假古人之名聞者以傳而人莫能辨也惜其蚤亡不大顯於世

王珣明州鄞縣人熙寧間上篆書證宗要畧三卷命為御書院祗候

周邦彥字美成號清真居士錢唐人官至祕書監尤長於歌詞正書行書皆善

蔣之奇字穎叔官至同知樞密院事亦善書

呂權福唐人元豐間工題署書

陳歸聖官至祕書丞能篆書尤工徑丈大字

關蒼舒

正書雄健而有楷則扁榜尤工

石蒼舒

書雖有骨氣而失於龕俗

王升

字逸老自號羔羊居士工草書殊有旭顛轉摺

態度宣和間以草書聖經上進除書錄其書尤為

內庭稱賞

杜從古

字唐稽官至禮部郎宣和中與米友仁徐兢

同為書學博士高宗云先皇帝喜書致立學養士

獨得杜唐稽一人餘皆体做了無神氣

李彭

字商老其字畫有鍾王之風自言法右軍之贍

麗用魯公之氣骨獵竒峭於誠懸體韻度於凝式

鄧浩

字志完號道鄉先生常州人官至吏部侍郎謚

曰忠元符間任諫爭危言讜論朝野推仰亦善書
陳瓘字瑩中號了翁南劍州沙縣人官至右司員外
郎字畫精勁蕭散有蘭亭典刑

沈遼字叡達號雲巢錢唐人官至太常寺奉禮郎以
善書稱王安石曾鞏師其筆法王得其清勁曾得
其真楷登科後游京師偶為人書裙帶詞頗不典
傳達禁中近幸嬪御服之遂塵乙覽後奪官流永
州徙池州卒

張察字通之成都人嘗帥鼎州以篆名今成都題榜
徃徃察之筆也

徐琰成都貢士工篆書宣和初嘗書劍南西川四大

字字身長五尺雄偉可喜

吳師孟

字醇翁官至知夔州善書

張商英

字天覺號無盡居士蜀州新津人官至尚書

右僕射謚文忠長身偉然姿采如峙玉喜草書而不求工

張唐英

字次功商英兄弟進士官至殿中侍御史少

攻苦讀書亦善筆札

趙霆

官宣德郎能篆書

鮑慎由

官宣德郎能行書

滕中

官承議郎能草書

劉瑗

官武勝留後能隸書

董儲

密人善書蘇軾謂近世亦少其比

劉燾

字無言温陵人以草書名世晚年雖用筆圓熟

然乏秀氣黃庭堅題續法帖云劉燾箋題便不類
今人書使之春秋高江東又出一羊欣薄紹之矣
朱服紹聖元年召試中書舍人上曰服文詞可采書
札亦工

晁適

字明遠世為澶州清豐人徙家彭門官至禮部

尚書謚文元性樂易寬簡書法楷正為時推重

葛珣

字叔寶紹聖間長於草書

杜芥

善草書清爽園媚誠精絕也

雷太簡

字簡夫工書自云少年時學王右軍樂毅論

鍾東亭賀平賊表歐陽率更醴泉銘褚河南聖教
序魏庶子郭知運碑顏太師家廟碑後又見顏行

書馬病帖乞米帖苦愛重之但自恨未及其自然
近刺雅安畫卧郡閣因聞平羗江瀑漲聲想其波
濤番番迅駛掀搯高下蹙逐奔去之狀無物可寄
其情遽起作書則中心之想出筆下矣

翟靜叔能草書嘗有跋米芾游金山龍游寺題名後
草書三行刻之石筆札駸駸逼古人

翟耆年字伯壽能清言工篆及八分

王仲疑字豐父官通議大夫有風采善詞翰

王鞏字定國魏州人工書小草頗有高韻雖不逮古
人亦可傳於世也

范文度能書有模本蘭亭記歐陽脩以為蔡君謨以

書心當世其稱范君不為誤矣

黃伯思字長睿別字霄賓號雲林子邵武人官至祕書郎天資警敏長於考古正行草隸書皆精初倣歐虞後乃規摹鍾王筆勢簡遠有魏晉風氣尤精小學凡字書討論備盡劉夢得云長睿好古善隸楷法能得古人用筆意

許采字師正吳興人字畫規模鍾繇殆窺其妙

陳昱官至寺丞少好學嘗於父伯脩枕屏效米芾筆迹書杜甫詩一日芾過伯脩見而驚焉因授以作字提筆法

項鍊字子立官水曹文章翰墨皆見重於前輩

柳洪學書中興頌筆力雖未絕勁而間架已方嚴矣

李康年字樂道江夏人好古博雅而小篆尤精黃庭

堅謂康年晚寤籀篆下筆自有可喜直木曲銑得之自然秦丞相斯唐少監陽冰不知去樂道遠也近

杜庭之善書蘇軾云杜庭之書世所貴重

程嗣昌字儒臣中山博野人少喜學書自謂獨得古

人用筆之妙嘗評近代能書者曰蘇才翁書筆執遲怯蔡君謨但能模學前人點畫及能草字而已周子發書妙出前輩至於草書殊未得自悟之意古人自悟者惟張旭與余而已

張友正字義祖陰城人自少學書常居一小閣上杜

門不治它事積三十年不輟遂以書名神宗評其
草書為本朝第一

吳皖

江南人大隸題榜有古意

何籀

信安人以隸書知名嘗書上饒令願君祠記識

者以為非漢人不能為也

袁液

字仙夫貴戚子姓而好學趣尚不凡工書

張闓道

善真草亦矯然自成一家風範

唐希雅

嘉興人書學李煜金錯刀法

慎夷

字伯筠工書王逢原贈之詩曰鐵索急纏蛟

龍僵蓋言其字之老勁也

韓璠

字景文開封人獻肅公絳之孫風采瓌潤字畫

道媚

杜仲微作隸書漢隸碑刻歲久風雨剝落故其字無復鋒鋷仲微乃用秃筆作隸自謂得漢刻遺法豈其然乎

仲翼官至太府寺丞善飛白草書

劉次莊字中叟崇寧中為御史有書名工正行草筆法出王大令褚河南而能兼采群書為一家行草差劣卜築於滄水之濱東山之麓所謂戲魚堂是也臨摹古帖最得其真凡草聖不可讀者以小楷譯之張舜民評其書謂如紅蓮新拆潤之以風雨

潘師旦官尚書郎模刻官帖骨法清勁今絳帖是也

沈文旭 大中祥符間為太子右贊善大夫善大字

劉澤 閩人善大字嘗書萬安橋三字在海石上徑三

尺許有隼尾存筋之法時蔡襄造橋不自書則澤

書可知矣

王惟恭 不知何許人工篆嘗與徐鉉等奉詔校定許

慎說文行于世

黃公孝 仁宗朝官至太常博士有詩名書師王右軍

徐易 海州人能篆隸 **安宜之** 長安人工楷書

夏竦 字子喬江州德安人官至樞密使封英國公進

封鄭國公贈太師中書令賜謚文正以言者改謚

文莊資性明敏多識古文學奇字至夜以指畫膚

晏殊字同叔撫州臨川人官至同平章事謚元獻

包拯字希仁廬州合肥人官至樞密副使謚孝肅

張齊賢字師亮曹州冤句人官至右僕射謚文定

富弼字彥國河南人官至左僕射韓國公謚文忠

唐本字子方江陵人官至叅知政事贈禮部尚書謚

質肅

劉摯字莘老永靜軍東光人官至右僕射謚忠肅

韓絳字子華其先真定靈壽人徙開封之雍丘忠獻

公億之子官至司空檢校太尉致仕康國公謚獻

韓維字持國絳之弟官至學士承旨

石永字守道號徂徠先生兗州奉符人官至太子中

允直集賢院

趙抃字閱道衢州西安人官至叅知政事贈太子少

師謚清獻

滕元發字達道東陽人官至龍圖閣學士知揚州謚

章敏

楊傑字次公號無為子無為人官至禮部貲外郎

賀鑄字方回號慶湖遺老衛州人官至倅太平州

沈括字存中錢唐人官至光祿少卿

毛滂字澤民號東堂元祐中蘇軾守杭日滂為法曹

劉涇字巨濟簡州陽安人官至職方郎中

韓駒字子蒼號牟陽仙井監人官至中書舍人

曾鞏字子固人稱曰南豐先生建昌軍南豐人官至中書舍人

范祖禹字淳甫一字夢得成都華陰人官翰林學士
李之儀字端叔號姑溪滄州無棣人官至通判原州
張舜民字芸叟號浮休居士邠州人官右諫議大夫
蘇幼學字行之温州瑞安人官至中書舍人

劉攽字貢父臨江新喻人官至中書舍人

右自晏殊至此並擅豪翰其蹟雜見群玉堂法帖
中按帖凡十卷元係安邊所申發朝廷以著庭東
廊為庫架設之榜曰群玉石刻著作佐郎傅行簡
書嘉定元年三月祕書少監汪遠改建室屋以藏

名曰群玉堂

宋祁字子京安陽安陸人後徙開封之雍丘元獻公
庠之弟官至翰林學士承旨謚景文

呂夷簡字坦夫先世萊州人後徙壽州官至太尉致
仕謚文靖

向敏中

字常之開封人官至左僕射謚文簡

邵雍字堯夫其先范陽人徙家河南其居曰安樂窩
自號安樂先生嘉祐詔求遺逸留守以雍應詔授
將作監主簿後復舉逸士補潁州團練推官皆固
辭乃受命竟稱疾不之官卒贈祕書省著作郎賜
謚康節

楊邦乂字希稷吉州吉水人官至翰林學士謚忠襄
蘇頌字子容泉州南安人徙潤州丹陽縣官至右僕射贈司空

龐籍字醇之單州武城人官至右僕射謚莊敏

趙挺之字正夫密州諸城人官至左僕射謚清憲

陳靖字道卿興化軍莆田人官至太常少卿

孔文仲字經父臨江新喻人官至中書舍人

胡宿字武平常州晉陵人官至樞密謚文恭

右自宋祁至此皆工筆札其蹟雜見鳳墅續法帖
中按帖凡二十卷石刻藏吉州鳳山書院乃曾宏父所集者

蘇庠字養直號後湖元豐中居廬山召不起胸中本

無軒冕是以風神筆墨皆自瀟散

王曾字孝先青州益都人鄉貢試禮部廷對皆第一

官至左僕射封沂國公謚文正書畫皆合格

王洙字原叔應天宋城人官至翰林學士少聰悟博

學通篆隸書

梁鼎字凝正益州華陽人官至判西京留司御史臺

偉姿貌有介節工篆籀八分

劉筠字子儀大名入舉進士官至集賢院學士贈右

僕射謚文恭好學有文善筆札

邵必字不疑丹陽人舉進士官至龍圖閣直學士知

成都善篆隸

陶穀字秀實邠州新平人官至戶部尚書贈右僕射

博通經史及諸子佛老多蓄法書名畫善隸書

鄭謨字本然不知何許人草書有晉光之遺則

吳元輔字正臣并州太原人官至定州鈐轄善筆札

宋湜字持正京兆長安人官至給事中充樞密使謚

忠定風貌秀整筆法道媚書帖之出人多傳效

周起字萬卿淄州鄒平人官至知汝州贈禮部尚書

謚安惠家藏書至萬卷能書集古今人書并所更

體法為書苑十卷弟**超**官至主客郎中亦能書

蘇易簡字太簡梓州桐山人官至知陳州贈禮部尚

書風度奇秀善筆札

趙安仁

字樂道河南洛陽人官至御史中丞謚文定

生而穎悟幼時執筆能大字及長善楷隸

高繼宣

字舜舉瓊之子家世燕人後居濠州官至眉

州防禦使知讀書工筆札

韓溥

京兆長安人官至司門郎中少俊敏縉紳推重

之尤善筆札人多藏其尺牘

姚鉉

字寶之廬州合肥人太平興國進士官至起居

舍人京東轉運使雋爽頗尚氣文辭敏麗善筆札

宗翼

蔡州上蔡人篤孝恭謹好學強記經籍一見即

能默寫學歐陽虞柳書皆得其楷法

孟云字遵聖西蜀昶子官至秦寧軍節度封滕國

公幼聰悟善隸書

高壽字公垂號三樂居士沔州人篆隸飛白皆造妙

李行簡字易從同州馮翊人中進士第官至右諫議

大夫集賢院學士改給事中家貧刻志於學聚木葉學書筆法道勁

李瑋字公炤錢唐人尚仁宗女充國公主官至駙馬都尉平海軍節度使善章草飛白散隸

任誼字才仲洛陽人官至澧州通判隸書學蔡邕

劉松老字榮祖涇之子書學米芾

王逸民永康導江人初為僧名紹祖書學黃庭堅

丁晞顏字令子書畫皆精

滕茂實字秀穎吳人初名裸登政和第徽宗改賜今

名官至太學正善篆

鍾離景伯字公序善書

鍾離權不知何時人間出接物自謂生於漢而唐呂

岩於吾執弟子禮双髻跣足睥睨物表自稱天下

都散漢又稱散人嘗草其所為詩字畫飄然有凌

雲之氣非凡筆也亦錄詩寄王鞏多論長生金丹

事終自論其書以謂學龍蛇之狀識者信其不誣

种放字明遠號雲溪醉侯河南洛陽人累拜工部郎

中卒贈尚書書迹有晉人風氣

蒲云漢州綿竹人幼有方外之趣布裘筇竹游山野
間類有道之士尤喜翰墨作正書甚古嘗以雙鉤
字寫河上公注道德經筆墨精細若游絲縈漢孤
煙裊風連綿不斷或一筆而為數字分布勻穩風
味有餘覽之者令人有凌虛之意

張有字謙中吳興人隱於黃冠善篆書法甚古有所
撰復古編行于世張徵云昔人作篆如李丞相李
少監徐騎省皆寫篆非畫篆是故用工至易如神
行乎中至陳晞章友直文勛輩縈豪洩墨如朽如
畫是故筆癡而無神近世吳興張有用寫篆法神
明意用到昔人波瀾復古編出而晞輩廢矣

內臣

岑宗旦

字子文開封人慶曆初以父遺表通籍
壁門然趣向高遠不苟合取容於世故終九品官
而無遺恨嘗取古之善書者自漢迄唐凡十有一
人為論以評其書曰張芝如班輸構堂不可增減
鍾繇如盛德君子容貌若愚語其衆妙足以爭造
化者羲之也較其父風但恨乏天機者獻之也世
南潛心羲之蓋若顏子之亞聖徐浩比肩伯儒有
類仲由之勇態歐陽詢得其正故如廟堂衣冠不
失動靜柳公權得其勁故如轅門列兵森然環衛
懷素之間逸故翩翩如真仙真卿之淳謹故厚重
如周勃至若李邕則舉動不離規矩而有虧適通

變之道焉此皆其自得於心積學於外而其吐論所以不愧古人者歟然宗旦作字尤善行書但銀鈎蠶尾脫去斌媚規模點畫當是蘇舜欽之亞顧筆力亦窮於此矣

內臣 **楊日言** 字詢直開封人喜經史工篆隸八分

荆國大長公主 太宗女幼不好弄喜圖史能為歌詩

善筆札

魏國大長公主 英宗第二女下嫁左衛將軍王詵好

讀古文章工筆札

越國夫人王氏 端獻王頹之室作篆隸有古法

和國夫人王氏 宗室趙仲輓室能詩章善字畫

徐氏蘊行 自號悟空道人臨川蔡教授誦之母學虞

世南書得楷法多手抄佛書

章氏煎 友直之女工篆書傳其家學友直執筆自高
壁直落至地如引繩而煎亦能如其父以篆筆畫
棋局筆筆勻正縱橫如一

徐氏清 字靜之蓬萊女官也下西里王氏詩作謝體
書效黃庭堅妍妙可喜陳無已詩云蓬萊仙子補
天手筆妙詩清萬世功肯學黃家元祐脚信知人
厄匪天窮

朝雲 字子霞 王氏錢唐人蘇軾之侍妾敏而好義
學軾楷書頗得其法

英英 姓王氏楚州官妓也學顏魯公書蔡襄教以筆法晚年作大字甚佳梅堯臣贈之詩曰山陽女子大字書不學常流事梳洗親傳筆法中郎孫妙盡蠶頭魯公體

楚珍 不知姓本彭澤娼女草篆八分皆工董史云家藏長沙古帖標簽皆其題署宣和間有跋其後者曰楚珍蓋江南奇男子初雖豪放不群終以節顯吾嘗見其過湖詩清勁簡遠有丈夫氣故知此人胸中不凡

馬昞 徐州營妓也性惠麗蘇軾守徐日甚喜之能學軾書得其彷彿軾嘗書黃樓賦未畢昞竊效書山

川開合四字軾見之大笑畧為潤色不復易之今碑四字乃晒筆也

道士

陳景元

字太虛號碧虛子建昌南城人喜讀書

至老不倦嘗與蔡卞論古今書法至歐陽詢則曰世皆知其體方而莫知其筆圓卞頗服膺生平不欲草字惟喜正書大抵祖述王羲之樂毅論黃庭經下逮詢化度寺碑耳故於古人法度粗已贍足

道士

任玄能

江南人工篆

司馬鍊師

善大篆及楷

釋法暉

政和二年天寧節以細書經塔來上作正書

如半芝麻粒寫佛書十部曰妙法蓮華經楞嚴經

維摩經圓覺經金剛經普賢行法經大悲經佛頂
尊勝經延壽經仁王護國經自塔頂起以至跌坐
層級鱗次不差豪末恍然如鬱羅蕭臺突兀碧落
說者謂作此字時取竅密室正當下筆處容光一
點明而不耀故至細可書然其字累數百萬不容
脫落而始終如一亦誠其心則有是耶

釋希白

字寶月號慧照大師長沙人作字有江左風

味慶曆中嘗以淳化閣帖模刻于潭之郡齋

釋穎彬

廬山人善王書

釋茂蔣

廬山人善王書

釋夢真

閩右人善柳書

釋苑基

浙東人善顏書

釋惠崇

壽春人善王書

言法華 工書蘇軾嘗云僕書作意便彷彿似蔡君謨得意便似揚風子更放則似言法華矣

都錢唐

高宗 諱構徽宗第九子善真行草書天縱其能無不造妙嘗言學書惟視筆法精神朕得王獻之洛神賦六行置之几間日閱數十過覺於書有所得又言學書必以鍾王為法然後出入變化李心傳以謂思陵本數黃庭堅書後以偽豫遣能庭堅書者為間改從右軍或云初學米芾又輔以六朝風骨自成一家

孝宗 諱昚太祖宗派秀王之子入繼大統敷文德求

民瘼明賞罰惜名器書有家庭法度

光宗

諱惇孝宗第五子亦能書

寧宗

諱擴光宗長子臨下以簡御衆以寬省刑薄賦

書學高宗

理宗

諱昀寧宗姪尊尚道學崇重士類其書亦從高

宗家法中來

度宗

諱叡理宗姪福王與芮子是時權臣持國帝擁

虛器而已書法體制不失家教

憲聖慈烈皇后吳氏

開封人吳宣靖王近之女高宗

后博習書史妙於翰墨帝嘗書六經賜國子監刊石稍倦即命后續書人莫能辨

恭聖仁烈皇后楊氏寧宗后忘其姓氏或云會稽人揚次山者亦會稽人后自謂其兄也少以姿容選入宮頗涉書史知古今書法類寧宗

景獻太子詢燕王九世孫希懌之子官至保寧軍節度使臨川郡王謚莊靖書法學高孝兩朝

趙子畫字叔問宗室也醞藉該洽蓄書近萬卷多所親校過江篆字為第一

趙必舉字伯晞號庸齋宗室也官至奏院宗丞善隸楷作續書譜辨妄以規姜夔之失

米友仁字元暉小字虎兒芾之子官至兵部侍郎力學嗜古善書黃庭堅嘗戲之詩云虎兒筆力能扛

鼎教字元暉繼阿章心畫之妙得於家傳父作子
述識者謂宋之有元章元暉猶晉之有羲之獻之
或謂作斜弩之筆一字皆成橫欹之勢此效父體
而用心太過耳

吳說字傳朋錢唐人高宗謂紹興以來雜書游絲書
惟錢唐吳說說知信州日朝辭上謂曰朕有一事
每以自慊卿書九里松牌甚佳向自書易之終不
迨卿所書當令仍舊是日降旨俾根尋舊牌張挂
說之見重於高宗如此

洪适字景伯號盤洲鄱陽人官至右僕射謚文惠篤
好漢隸有隸纂隸釋隸韻皆盡漢刻之本末矣

徐兢字明叔號自信居士歷陽人鉉之後自題保大
騎省世家宣和間嘗為書學博士度江仕高宗朝
工篆法以李斯為本張孝伯謂兢書筆力奇古其
沈著處不異鑽刻若非豪楮所能成且復陶鎔醞
釀變入小篆離析偏旁昭合制字來意從橫馳騁
其用無窮

徐林字淮山兢之兄

徐琛兢之弟並以篆名家

徐葳字子禮號自覺居士林之子工篆隸篆宗家學

隸學逢童子碑

張守字全真常州人高宗朝參知政事字畫圓熟流

美世不多見

陳恬

字叔易陽翟人為祕書省校書郎後弃官卜築嵩華間號澗上丈人能書

王利用

字賓王潼川人舉進士第官至夔憲工書畫

高宗特愛其書

汪藻

字彥章饒州德興人官至翰林學士博極群書手不釋卷工小篆

康與之

字伯可號順菴中州人南度初以文辭待詔金馬門學書於陳恬有書傳於世

陸游

字務觀號放翁會稽人官至寶章閣待制致仕才氣超邁尤長於詩書迹飄逸

向子諲

字伯恭號薌林臨江人官至戶部侍郎書蹟

傳世人多寶之

王安中字履道號初寮書法清俊

劉岑字季高能草書縱逸而不拘蓋有自得之趣

薛尚功字用敏錢唐人官至僉書定江軍節度判官

廳事善古篆尤好鐘鼎書有鐘鼎彝器款識二十卷及鐘鼎韻七卷行于世

吳琚字居父號雲壑汴人憲聖皇后姪太寧郡王益

之子官至進安節度使進少保謚獻惠世稱吳七郡王性寡嗜好日臨古帖以自娛字書類米芾以

詞翰被遇孝宗大字極工

蔣棻字宣卿紹興間戶部侍郎敷文閣待制善行書

亦長於大字皆有韻度得古人用筆意大者徑尺小者如蠅頭恠竒偉麗獨步一時議者以祭書圓媚縝密然少蕭散

胡世將

字承公常州晉陵人官至端明殿學士嘗類集古今石刻為若干卷名曰資古錄所書錢柱銘刻于延真宮邦人習書多取為楷則

單夔

官至侍從倣唐八分方勁有體蓋積習之能非不知而作者嘗帥豫章故書迹間有存焉

單煒

字炳文號定齋居士沅陵人以武舉得官仕至路分博學能文於訂考法書尤精字畫道勁得二王法度

司馬括字子開文正公光之後寓居豫章頗長於隸

亦善行押

張孝祥

字安國號于湖歷陽烏江人讀書一過目不

忘下筆頃刻數千言紹興中廷對第一御覽試策
有詞翰俱美之褒官至顯謨殿直學士篆書極工
大字亦佳楊萬里謂安國書甚真而放

胡瑄

字德輝書學鍾繇

朱昌齡

書亦佳

范成大

字至能號石湖居士吳郡人擢紹興進士第

官至資政殿大學士少高放以能書稱字宗黃庭
堅米芾雖韻勝不逮而遒勁可觀

魏了翁

字華甫臨邛人登進士第官至贈太師封秦

國公謚文靖學者稱鶴山先生善篆不規規然繩
尺中而有自然之勢嘗以篆法寓諸隸最為近古
魏克愚字明已號靜齋了翁之子亦工篆

王埜字子文婺州金華人官至端明僉樞密院善楷
隸行草小楷深入率更戶庭大字難為結密而埜
獨有餘且有位置漕江西日徧易諸處扁榜而以
已書張之

周頌乃益公之後嘗倅洪其書清勁復工扁榜大字
虞似良字仲房號橫溪自稱寶蓮山人吳郡餘杭人
官至監左藏東庫善篆隸法尤工家徒四壁藏
漢刻數千本心慕手追盡得旨趣其分析波畫正

是偏傍各有根據大至數尺小至蠅頭無不能也
亦能古文奇字

謝諤字昌國號良齋清江人書法似蘇軾而少變其
體大抵窘於舒放然自成一家執筆如捉賊此或
近之

楊無咎字補之號逃禪老人又號清夷長者清江人
後寓豫章高宗朝以不直秦檜累徵不起書學率
更小變其體江西碑碣多無咎書小字尤清勁可
愛嘗自題所葺邕禪師塔銘後云予於率更為入
室上足

甘叔異字同炳豫章人為人豪放不區區拘引繩墨

以學問稱雄一郡行書學米芾草書學黃庭堅

姜夔

字堯章號白石道人番陽人能詩文書法迥脫

脂粉一洗塵俗有如山人隱者難登廟堂嘗著續

書譜一篇以繼孫過庭之作頗造翰墨閫域

杜良臣

字子卿豫章人學問該洽以小篆見重一時

筆法精妙考究古學為詳

牟益

字德新晚年喜篆書深究古文嘗取詛楚石鼓

鐘鼎等文為辨證一編以糾前時釋文之誤

曹士冕

字端可昌谷之後博叅書法服膺蘭亭

張即之

字溫夫號樗寮歷陽人叅政孝伯之子官至

直祕閣致仕以能書聞天下特善大字為世所重

陳讜字正仲興化人官至尚書與張即之同時並以書名

劉震孫字長卿號朔齋中州人善大字尤有位置

袁垌字季野豫章人學率更書亦道媚可愛但乏氣骨耳

張謐字季萬本北人居滁州善草書

祝次仲字孝友太末人善草書

姚敦字公儀江左人潛心篆學得前古遺意

鄭元秀善隸書

李肩吾字子我號蠙州魏文靖公門人能書取隸楷之合於六書者作字通行于世

朱熹字元晦一字仲晦徽州婺源人後寓崇安又徙建陽之考亭中紹興進士第官至煥章閣待制贈太師封徽國公謚曰文學者稱之曰晦菴先生熹登第五十年仕於外者僅九考立朝纔四十日簞瓢屢空晏如也善正行書尤工大字嘗評諸家書以謂蔡忠惠以前皆有典刑及至米元章黃魯直諸人出來便自欹斜放縱世態衰下其為人亦然

劉克莊

字潛夫號後村興化人官至尚書謚文定書迹亦佳

鄭僑

字惠猗號回溪興化人狀元及第官至叅知政

事贈太師封郇國公謚忠惠善行草著書衡三篇

鄭寅字子敬僑之子官至尚書左司除寶章閣致仕
博極群書留心翰墨作包蒙七卷其畧曰伏羲之
八卦皆當時之古文也三皇尚忠五帝尚質三王
尚文八卦忠也古文質也籀文也篆則王降而霸
矣隸其秦之法令書乎古隸隸之古文也八分隸
之籀也楷法隸之篆也飛白八分之流也行楷之
行也草楷之走也隸以規為方草則圓其矩而六
書之道散矣

米尹仁

友仁之弟亦有書名

李昭

字晉傑郵城人篆學三墳記甚工

鄭昂

字尚明福州人善筆翰嘗撰書史二十五卷

葉鼎

字和仲號山澗古括人篆隸皆能之

顏直之

字方舛號樂閒居士吳人官至中散大夫杜

門不妄交游專意雅尚尤工篆書法度森嚴以追

蹤徐張嘗手寫集古篆韻廿卷今藏雲間朱芾家

朱棻

字文芳錢唐人

高瘳

字止善梁溪人

刁衍

字元賓

陳希愈

字師韓

杜茂脩

右五人並善書

陳與義

字去非號簡齋其先居京兆後遷洛陽官至

叅知政事

張九成

字子韶號無垢居士其先開封人徙居錢唐

官至叅知政事

晁補之

字無咎號歸來子濟州鉅野人舉進士官至

禮部郎中

右三人並擅豪翰其蹟雜見群玉堂法帖中

楊萬里

字廷秀吉州吉水人官至江東轉運使贈光

祿大夫高宗嘗為書誠齋二字學者稱誠齋先生

胡安國

字康侯號草菴居士建寧崇安人中進士第

官至給事中兼侍讀進寶文閣學士謚文定

胡寅

字明仲號致堂安國子擢進士第官吏部侍郎

胡宏

字仁仲號五峯寅之弟

鄭清之

字德源慶元鄞人登進士第官至左丞相追

封魏王謚忠定

史彌遠

字同林四明人官至左丞相封越王

陳康伯

字長卿信之弋陽人官至左僕射封魯國公

謚文恭

唐璘

字伯玉古田人舉進士官至太常少卿

李綱

字伯紀號梁溪邵武人徙居無錫登進士第官

至尚書左僕射贈少師謚忠定

劉子翬

字彥冲號屏山建州崇安人贈太師幹之子

官至通判興化軍

右十人皆工筆札其蹟雜見鳳墅續法帖中

楊鎮

字子仁號中齋嚴陵人節度使蕃孫之子尚理

宗女周漢國公主官至左領軍衛將軍駙馬都統
謚端孝喜觀圖史書學張即之

韓溫字天和工篆

葛剛正工篆

畢良史字少董紹興間進士能寫唐人小楷

婁機字彥發嘉興人中乾道進士第官至叅知政事

深於書學尺牘人多藏去所著漢隸字源傳于世

杜杲字子昕邵武人官至刑部尚書為文麗密清嚴

善行草學急就章

翟汝文字公巽潤州丹陽人官至叅知政事風度翹

楚精於篆籀

丁德隅中吳人晉公謂之孫工篆

秦檜字會之江寧人登政和第官至左僕射贈申王謚忠獻開禧中追奪王爵改謚繆厲能篆嘗見金陵文廟井闌上刻其所書玉兔泉三字亦有可觀雖以一藝之小善莫掩萬年之遺臭姑存之以為姦臣逆賊懲

文天祥字宋瑞一字履善吉之吉水人舉進士第一官至右丞相加少保封信國公體貌豐偉美皙如玉秀眉而長目忠義名節炳煥史冊善小篆嘗見丹書一硯後云紫之衣兮緜緜玉之帶兮鄰鄰中之藏兮洲洲外之澤兮日宣烏乎磨尔心之堅兮壽吾文之傳兮廬陵文天祥書共四十四字筆畫

貞勁似其人也

林希逸

官至考功員外郎能書子

泳

亦能篆

樓鑰

善大字高宗時大學成奉敕書扁

張安國

歷陽人學顏書

顏汝勳

字元老官至朝請大夫善筆札

魏宋直

號穎峯山人書宗米芾

曲端

字平甫鎮戎人官至宣州觀察使謚壯閔端本

武士而知書善屬文長於兵畧作字奇偉

曹松泉

天台人攝棗陽倅日穆陵遣賜督府詩字可

尺許曹乃效李陽冰篆作一圖以賀又以古篆文

十二冊為侑皆江南之所未見者古石鼓文尚在

卷末

戴侗字

永嘉人亦能篆有所編六書故行于世

葛長庚

自號白玉蟾閩人嗜酒苦吟善草

內臣**王介**

字默菴亦稱能書

劉夫人

希字號夫人建炎間掌內翰文字及寫宸翰

字高宗甚眷之亦善畫畫上用奉華堂記印

楊氏

寧宗皇后妹時稱楊妹子書法類寧宗馬遠畫

多其所題往往詩意閑涉情思人或譏之

胡夫人

自號惠齋居士平江人胡尚書與可女黃尚

書子由妻能草書雖未有體法然大書宏放亦婦

人所難

翠翹 失其姓洪內翰侍人字畫婉媚

蘇氏 建寧人淳祐間流落樂籍以蘇翠名能八分書

嚴蕊 字幼芳天台營妓也善琴弈書畫

田田 錢錢 辛弃疾二妾也皆因其姓而名之皆善

筆札 常代弃疾答尺牘

釋德也 號清谷善屬文尤工正書

釋省肇 德一作蘆山人工行書蘆山多有所書碑刻

釋思齊 杭人書師柳公權有所書放生池碑在杭州

釋仁濟 字澤翁書師蘇軾

釋從密 字世疎長沙人以草聖為世所稱

釋子温 字仲言號日觀居錢唐瑪瑙寺人但知其畫

蒲萄而不知其善草書也其所畫蒲萄枝葉皆草書法也

書史會要卷之六

徐氏仲寬彦裕

王氏復初

吳氏景元本

陳氏伯敬文肅

姚氏舜俞

助貲刊版

七



書史會要卷之七

南村處士陶宗儀九成著

大元

英宗 蒙古氏諱碩德八剌仁宗子承武仁治平之餘
海內晏清得以怡情翰嘗見宋宣和手敕卷首
御題四字又別楮上曰光照吾民月色清我心十
字一琴上至治之音四字皆雄健縱逸而剛毅英
武之氣發于筆端者亦足以昭示於世也

文宗 諱脫脫木兒武宗子以聰明睿知之資入正大
統廼稽古右文開奎章閣置學士真討論治道幾
致刑措喜作字每進用儒臣或親御宸翰作敕書

以賜之自寫閣記甚有晉人法度雲漢昭回非臣庶所能及也

唐帝

諱妥歡帖木爾明宗子天性仁恕務以寬平致治改奎章為宣文崇儒重道尊禮舊臣萬幾之餘留心翰墨所書大字嚴正結密非淺學可到奎畫傳世人知寶焉

愛猷識理達臘

帳帝子風儀俊邁性資英偉帝於東

宮建端本堂置賢師傳以教之知好學喜作字真楷適媚深得虞永興之妙非工夫純熟不能到也

趙孟頫

字子昂號松雪道人宋太祖子秦王德芳之後五世祖秀安僖王子儻實生孝宗賜第居湖州

故公為湖州人在宋試中國子監國朝混一程文
憲以行臺治書侍御史奉詔訪江南遺佚得廿餘
人公居首選又獨引公入見神采秀異照耀殿庭
世祖稱之為神仙中人特授兵部郎中歷事成武
仁英五朝累遷至翰林學士承旨贈江浙等處行
中書省平章政事追封魏國公謚文敏性通敏持
重未嘗妄言笑書一目輒成誦詩賦文辭清邃高
古善鑒定古器物名畫畫山水竹石人馬花鳥悉
造其微尤善書為國朝第一篆法石鼓詛楚隸法
梁鍾草法羲獻或得其片文遺帖亦誇以為榮然
公之才名頗為書畫所掩人知其書畫而不知其

文章知其文章而不知其經濟之材也弟孟顛字子俊亦工書殊得公之家傳

鄧文原

字善之其先自巴西徙杭由儒學正累遷至

嶺北湖南道肅政廉訪使贈江浙等處行中書省平章政事追封南陽郡公謚文肅嘗自題其齋居之室曰素履人遂稱素履先生丰姿凝粹內嚴外恕為文精深典雅詩簡古而麗正行草書早法二王後法李北海虞文靖云大德延祐間漁陽吳興巴西翰墨擅一代黃文獻奉敕撰公神道碑云工於筆札與趙魏公齊名

鮮于樞

字伯幾號困學民漁陽人官至太常寺典簿

面帶河朔偉氣每酒酣驚放吟詩作字竒態橫以
善行草趙文敏極推重之評者以謂太常蚤年嘗
作吏故所書未能脫去舊習不免間有俗氣曾見
手編草韻下用小楷音釋類鍾元常尤不可得也

虞集

字伯生晚稱翁生號邵菴其先蜀人徙撫之崇

仁官至奎章閣侍書學士翰林侍講學士贈雍國
公謚文靖博文明識精於辭藝真行草篆皆有法
度古隸為當代第一

姚樞

字公茂號雪齋營州柳城人官至中書左丞翰

林學士承旨謚文獻其歷官政績具見名臣事畧
善草書

姚燧

字端夫號牧闇樞之子官至集賢大學士謚曰文以文章名海內書宗顏素

程鉅夫

字文海號雪樓廣平人官至翰林學士承旨封楚國公謚文憲世以文學知名謇謇有王臣節字體亦純正大抵飽學儒流下筆處暗合書法茲胸次然也亦工大字

元明善

字復初清河人官至翰林學士湖廣行省叅知政事謚文敏文章言行有聲于時書體純熟似守李北海之矩度

郭貫

字安道真定人官至集賢大學士尚氣節君子人也工篆書

盧摯

字慶道號踈齋涿郡人官至翰林學士亦能書

范梈

字德機臨江人官至翰林待制廣東廉訪僉事

博學善屬文於詩尤長古隸清勁有法

揭傒斯

字昉碩臨川人官至翰林侍講學士封豫章

公謚文安學藝淵博而能以和靜致治正行書師
晉人蒼古有力

周馳

字景遠聊城人官至僉燕南廉訪司事經術贍

逸憲度著明行草宗二王婉約豐妍

柳貫

字道傳金華人官至翰林待制為文章有奇氣

工篆籀於大字得體杜本謂其妙處不減李陽冰

周仁榮

字本心天台人由文學累官至翰林待制以

文章名而楷書宗歐率更尤為時所重

吳澂字幼清晚稱伯清號草廬臨川人官至翰林學士贈江西行省叅知政事謚文正以文章道德稱于時深究六書之義直用篆法而結體加方以成一家之書

張起岩字夢臣河南人狀元及第官至翰林學士承旨中書平章政事意氣雄傑其書見於篆法處是宜皆有勝韻

史弼字君佐號紫微老人真定人官至江西行省平章政事封鄂國公有經濟之才後生望風內謁書師晉人亦善大字

袁棟字伯長四明人官至翰林侍講學士謚文清篤學多所通曉書從晉唐中來而自成一家

王士熙字繼學構之子東平人官至江東廉訪使贈中書平章政事封趙國公風氣蘊藉為名流所慕書法亦清潤完整

趙雍字仲穆魏國公子官至集賢待制同知湖州路總管府事姿貌雄偉豪爽有風槩工真行草篆篆法二李而清勁有餘真行草法魏公公嘗為幻住菴僧寫金剛經未及半而薨雍足成之其聯續處人莫能辨於此有以見其得家傳之祕也子**鳳**字允文**麟**字彥徵亦習書更益以工便可造父之域

趙奕字仲光雍之弟隱居不仕日以詩酒自娛工真

行草書其合作者可與魏公亂真

李章字君章東平人性通簡書法亦可尚

張衡字士衡樂陵人官至中書省真外郎少以才學

知名草書師張長史

李有字仲方燕人官至兩浙都轉運鹽使司經歷通

雅博暢尤工古隸

吾衍字子行號竹房太末人寓杭之生花坊隱居求

志好古博學凌物教世不交雜客與趙魏公相厚

善精於篆專法李陽冰律以石鼓當代獨步

吳正道番易人世為儒家深好篆法著六書淵源字

偏傍辨誤存古韻譜等書吳文正為序之

楊桓字武子魯郡人官至祕書少監善大小篆嘗著六書統以詔書刻之尚方多出己意篇帙浩穰學者莫之能究

金應桂字一之號蓀彛錢唐人在宋為縣令入朝不仕楷書師歐陽率更體雖純熟然乏氣韻

龍興字聖與號翠岩淮陰人宋兩淮制置司監當官入朝不仕博聞多識耿介不同於俗作古隸得漢魏筆意

白珽字廷玉號湛淵錢唐人德望清重書學米元章仇遠字仁近號山村錢唐人好古博雅楷書學歐

薛漢字宗海德清人官至國子助教楷書宗歐率更

薛植字子立漢之子思致淵富精於楷書一點畫不

苟作殊有率更之體略

錢選字舜舉吳興人小楷亦有法但未能脫去宋季

衰蹇之氣耳

張孔孫字夢夫濟南人官至河南廉訪使書宗黃華

史性良字顯甫鄆城人官至中書平章政事書有晉

人法度亦能大字

儀字子威真定人官至翰林學士善古隸

王士點字繼志士熙之弟官至四川雲南廉訪副使

善大字亦能篆

歐陽玄字原功號圭齋潭之瀏陽人登進士第官至翰林學士承旨福建閩海道肅政廉訪使贈大司徒楚國公謚曰文行草畧似蘇文忠而剛勁流暢風度不凡未易以專門之學一律議之

黃潛字潛卿婺之義烏人登進士第官至翰林侍講學士謚文獻淹該經術書宗薛晉公而自成一家危承旨嘗云吾平生學書所讓者黃潛卿一人耳

危素字太樸臨川人官至中書左丞翰林學士承旨文藻敏贍善楷書有釋智永及虞永興之典則

張翥字仲舉號蛻菴河東人官至翰林學士承旨嶺北行省平章政事封潞國公博綜群書作為文辭

擅一時之譽蚤年書學鍾元常

陳繹曾

字伯敷吳興人官至翰林編脩學識優博真

草篆隸俱通習之各得其法

陳旅

字衆仲莆田人官至國子監丞博學強記以文

章名世善古隸而行楷亦有法

杜本

字原功號清碧其先京兆人從居武夷博該經

術淹貫古今多藏古圖畫器物名帖至正間朝廷
以翰林待制聘至杭託疾而還工楷隸楷書結體
謹嚴全具八法隸書學漢楊馥碑

段天祐

字吉甫汴人官至江浙儒學提舉亦號能書

龔璠

字子敬高郵人書有晉宋人法度

楊益字友直洛陽人官至臨江路總管古隸學廬江

太守碑亦能篆

劉致字時中河東人官至翰林待制風情高簡蚤負聲譽能篆有所著復古糾繆編行于世行草宗晉人而不純熟

張德琪字廷玉燕人草書學張長史行書亦佳

牛麟字伯祥太原人大字尤為時所稱美

趙鳳儀字瑞卿號怡齋汴人官至京畿都漕運使練

達吏治善扁榜大字

王都中號本齋閩審知之後居平江官至河南行省

叅知政事謚清獻以廉不自持為政簡而不凡大

字似其為人小字亦善

趙期頤

字子奇汴梁人官至陝西行臺治書工於篆

李洞

字溉之濟南人官至翰林學士書有晉宋家法

柯九思

字敬仲號丹丘生台州人官至奎章閣鑒書

博士能詩文善鑒古器物書畫亦善書

傅若金

字汝礪新喻人官至廣東廉訪照磨長於詩

正書學歐陽率更

蘇天爵

字伯脩趙之藥城人再從真定官至江浙行

省參知政事兩浙都轉運鹽使書學趙魏公

李敏中

字好古河南人官至陝西行省郎中工大字

石岩

字民瞻京口人官至縣尹隸書學韓尚書

張璘字公弁保定人官至集賢大學士封滕國公少而岐嶷早以才學知名篆書亦淳古可取

倪中字中愷信州人官至翰林待制正書端謹清潤
高翼字茂之南陽人官至嘉興路推官正行草書皆從晉宋規矩中來但以不知六書偏傍時作課字為識者所鄙耳

班惟志字彥功號恕齋大梁人官至集賢待制江浙儒學提舉初徽仁裕聖皇后以泥金寫大藏經鄧文肅舉惟志入經局補州教授累官至今任早歲宗二王筆執翩翩不失書家法度晚年學黃華應酬塞責俗惡可畏文宗嘗評其書謂如醉漢罵街

吳里字處仁號逸民錢唐人官至江陰州儒學教授
草書師鮮于太常

汪從善字國良杭州臨安人官至邵武路總管正書
亦合晉人紀律兼能大字

任仁發字子明號月山松江人官至都水庸田副使
以畫馬得名中年後方專意學李北海書即得法

宗椿字壽卿山東人官至江南行臺照磨書學王黃
華尤工大字

余謙字峻山池陽人官至江浙儒學提舉善古隸

孟昉字天偉大都人官至江南行臺監察御史工書

劉楨字廷榦燕南人官至福建行省叅政亦能書

胡長孺字汲仲號石塘金華人官至台州寧海縣主簿耿介不同於俗下筆言語妙天下正書學鍾繇剛勁骨立似其人也

周伯琦字伯溫號玉雪坡真逸番易人官至江浙行省左丞江南行臺侍御史潛心古學小篆師徐鉉張有行筆結字殊有隸體嘗著六書正譌及說文字原二書刊梓于平江路儒學正書亦善

胡益字士弓番易人官至叅知政事真草師趙魏公都下碑刻多其所書

熊朋來字與可自號彭蠡釣徒學者稱天慵先生豫章人官至福清州判官先任福建廬陵兩郡教授

日所至即考古篆籀文字所作字以篆法寓諸隸體最為近古此法蓋做魏鶴山云

袁衷

字德平四明人所著書學纂要使游藝者有所

歸宿其論人品格調亦造玄微所書宗晉

鄭瑤

字彥瑛與趙魏公同時其書甚相類

章德懋

與趙魏公同時專學公草書每與公代筆以

塞求者之責

陸才

字友仁平江人好古博雅真草篆隸皆有法

錢良右

字翼之平江人耽古篤學真草篆隸得筆意

錢達

字伯行平江人才氣飄逸真草篆隸不失規矩

羅元

字君仁平江人從容澹靜行楷有晉人風致

吳叡字孟思錢唐人工篆隸而於古隸尤精但筆畫雕刻人以為病

俞和字子中號紫芝生武林人真行草書皆師趙魏公其合作者用公欵識殆不能辨真贗

宣昭字伯綱號良齋漢東人有雅行博通古今天文地理陰陽術數百氏之學無不諳詣尤精翰墨正書師歐陽率更字字該備八法

鄭杓字子經莆田人能大字兼工八分有所著衍極行于世

余襄番易人工篆而大字尤善

程君寶灤源人草書有顛素之體

王翼字元徵號華陽生金壇人有所篆四書行于世
鄭燁莆田人天才卓出八分書能世其學

吳福孫字子善錢唐人官至松江上海縣主簿居官
在能否之間雖以篆楷稱要亦未為甚善

應在字止善句章人工篆嘗作篆隸偏旁點畫辨行
于世

吳炳字彥輝汴人身安畎畝朝廷三聘不起工篆書
王畝字季野都中子官至成都路判官清峻有高譽

真行草師二王圓勁成就度越流輩

鮮于去矜字必仁號苦齋樞之子書得家傳之法

鮮于端字文肅樞之孫書迹不失家學

邊武字伯京隴西人行草專學鮮于太常時有亂真

者子**定**字文靜正書學宣昭亦稱善

俞鎮字伯貞嘉興人官至建德縣尹行草師李北海

董復字君復沂州人居鎮江書學鮮于太常

李字申伯江右人官至集賢待制古隸專學孫

勲教碑得方勁古拙之法

林鏞字勲大嘉興人官至江浙行省員外郎正書學

虞永興而未熟

王務道字弘本山陰人古隸學孫勲教碑

吳志淳字主一曹南人古隸學孫勲教碑

洪恕字主敬金華人始學鮮于太常亦號能書後乃

放乎法度之外無足觀矣

胡布字子申河南人有材氣善草書

鄭禧字熙之吳郡人亦善書

曹瑩字子學東平人善古隸

吳雲字友雲義興人官至太子司經以才穎見稱書

師虞永興

揭汝字伯防僊斯子官至燕南廉訪副使風尚通雅
言議英秀正書得用筆意

陳述字元達永嘉人官至崇文少監太子贊善志行
脩整真草師二王不以規矩自窘

饒介字木之番禺人博學有口才草書亦飄逸

宋振

字良玉番易人草學聖教序真師趙魏公

蔣惠

字季和號紫芝山人番易人博學多通機敏有

幹行草師鮮于太常正書多晉人氣格

楊遵

字宗道浦城人徙居錢唐篆隸皆師杜待制

王默

字伯靜松江人書學趙魏公行筆甚捷

劉堪

字子輿樵李人思致淵富工於古隸

王餘慶

字祿善四明人官至江南行臺監察御史草

書學夔正齋甚似

王順

字祖孝餘慶子正書亦善

繆貞

字仲素姑蘇人篆書宗張有

鄔進禮

字行義武林人書師趙魏公

周砥字履道姑蘇人性字間靜學藝淹該正行草書
運筆分布勻穩殆非一朝夕之功

宋克字仲溫姑蘇人少俊爽不群知好學喜弄筆翰
於草書尤工

楊基字孟載其先蜀人後居中吳文采秀麗為名流
所稱正書師鍾元常行草師二王

盧熊字公武崑山人雅有材行篆隸章草悉諳其趣
宋燧字仲珩金華人蚤承家學有文而風致整峻大

小二篆純熟姿媚行書亦有氣韻

張體字孟膚江陰人隸書時作顛掣執蓋學李重光
金錯刀法而行楷亦善又雙鈎書極純熟可喜

張瑄字藻仲江陰人少敦學行作字得行楷之法

唐肅字處敬紹興人讀書能文辭書迹亦佳

陳睿字思可會稽人學藝妍贍真楷宗智永

朱芾字孟辨松江人才思飄逸工詞章翰墨之學真草篆隸清潤適勁風度不凡

陳璧字文東松江人少以才學知名真草篆隸流湯快健富於繩墨

褚英字士文錢唐人篆隸專學吳睿惜其不能以古人為師伎遂止於此耳

唐志大字伯剛如臯人多蓄古法書名畫行草落筆峻激畧無滯思

曹永 字世長 正書學 鍾元常行草學 二王松江人

揭雲 字之德 文安孫 正書學 智永

黃中 字彥美 武林人 草亦可尚

歐復 字伯誠 番禺人 善古隸

易履 字安道 茶陵人 能草

葛萬慶 廬山人 居越中 號越臺洞主 能為詩 務出人

不道 詔善草書 酒酣落筆 愈得其妙

杜敬 字行簡 號夷門 老人 汴人 徙居錢唐 畜古名人

墨迹 歷代金石刻 甚富 亦工觚翰

宋季子 以字行 臨川人 能古隸 嘗增廣宋婁機漢隸

字源 及撰兩漢字統 凡十二卷

衛德辰

字立中華亭人素以材幹稱書學舍利塔銘

衛仁近

字叔剛德辰姪經子百氏無不該楷書學黃

庭經自有一種風流蘊藉俠才子氣

章弼

字共辰松江人篤志經史識度清遠未十歲即

能扁榜大字及長真行草篆皆師趙魏公

陳德永

字叔夏黃岩人德望清重書宗李北海

范

字守中黃岩人博綜群籍才行高潔書師趙

魏公州里碑碣所書為多

楊彛

字彥常錢唐人登進士第官至翰林編脩篆隸

正書咸可取

張翼

一名翊字翔南其先睦人徙居攜李博學強記

屬文敏捷好為奇澁語而切於理正書宗晉

邵亨真字復孺其先睦人徙居華亭博通經史贍於
文辭且工篆隸

王逢字原吉江陰人才氣俊爽其屬辭於詩尤長作
行草初非經意大率具書家風範

揚惠不知何許人嘗任江南行臺監察御史善大小
二篆

龔觀豫章人能篆

王俟不知何許人嘗僉浙東廉訪司事書蘭亭書院
扁其姓名乃與宋王俟書蘭亭扁者同

李介石字守道天台人以儒術飾吏事亦能古隸

周宗仁

字克復伯琦之子官至山東行省左右司郎

中篆書宗其家學然不逮父

范居中

字子正武林人亦工筆札

張紳

字士行山東人負才畧談辨縱橫能作篆書

杜從訓

字義方鄆城人官至江陰州尹書效蘇黃

張伯仁

字至道閩人善篆及行草

鄭炳

字元炳餘姚人書迹似晉人

汪正

字大雅四明人工八分書

李林

字九臯錢唐人古隸學受禪表

陳謙

字伯謙天台人正書師虞永興

王禮

字禮仲揚州人篆宗張謙中

何仲章

吳興人

鄧學可

惟揚人

卓習之

慶元人

吳志行

錢唐人

陳宗亮

諸暨人

朱俊卿

武林人

呂中立

會稽人

杜伯循

江右人

徐子愚

嘉禾人

右九人皆留心翰墨有聲于時

貢師泰

字泰甫宣城人官至戶部尚書楷書亦善

先子諱

煜字明元號白雲漫士上虞典史贈承事郎

福建江西等處行樞密院都事蚤歲館授京師時

學書於雪菴得其典則季父諱復初字明本號介

軒老人台州儒學教授贈從事郎温州樂清縣尹

小篆師徐張古隸師鍾梁從弟宗暹一名文昭字

晉生江浙等處儒學副提舉楷書學歐陽率更

廉希貢字薊林畏吾人官至昭文館大學士封荊國

公善扁榜大字

貫雲石海涯

號酸齋北庭人官至翰林侍讀學士豪

爽有風槩富文學工翰墨其名章俊語流於豪
者恠恠竒竒若不凝滯於物即其書而知其胸中
之所養矣

余闕

字廷心武威人登進士第官至浙東肅政廉訪

司副使兵興升淮西宣慰使出鎮安慶堅守六年
城陷偕妻子死之累贈湖廣行省平章謚忠宣風
采峭整負大節以王佐自任工篆隸字體淳古

盛熙明

其先曲鮮人後居豫章清脩謹飭篤學多材

工翰墨亦能通六國書至正甲申嘗以所編法書考八卷進上覽之徹卷命藏禁中

蕭搏

字圖南本契丹人金王黃華甥博學多能詩書畫皆追蹤舅氏

劉若水

字澹齋女直人喜弄觚翰子

塤

亦能篆

甘立

字允從河西人官至中書檢校才具秀拔亦善

書札

嶮夔

字子山號正齋恕叟康里人官至翰林學士承

旨風流儒雅知經國大體博涉經史刻意翰墨正書師虞永興行草師鍾太傅王右軍筆畫道媚轉摺圓勁名重一時評者謂國朝以書名世者自趙

魏公後便及公也

回回字子淵夔夔弟官至中書平章政事正書宗顏魯公甚得其體

阿尼哥字西軒蒙古人官至大司徒封國公善大字

素不華字蕪善元名達溥化御賜今名號白野蒙古

人狀元及第官至浙東宣慰元帥台州路達魯花

赤沒於王事追贈江浙行省平章政事封魏國公

謚忠介以清厲顯名骨鯁不同於物篆書師徐鉉

張有稍變其法自成一家行筆亦圓熟持乏風采

耳常以漢刻題額字法題今代碑額極高古可尚

非他人所能及正書宗歐陽率更亦有體格

幹玉倫都字克莊西夏人官至山南廉訪使文章事

業夔出人表書蹟亦佳

薩都刺字天錫回紇人登進士第官至淮西廉訪司
經歷有詩名善楷書

道童字石岩蒙古人官至江西行省平章政事封司
徒姿儀雄偉威惠著明尤工大字能作雙鉤書

慶童字正臣康里人官至中書右丞相器量弘重政
教宣著善大字

脫脫蒙古人官至中書右丞相贈太師封鄭王材器
宏大智謀善斷扁其燕處之室曰道濟書院延納
儒士討論治道善大字

也先帖木兒

脫脫弟官至御史大夫亦能大字

沙刺班

字惟中蒙古人官至集賢大學士善大字

別兒怯不花

蒙古人官至中書右丞相有治國之才

善大字

達識帖木兒

字九成康里人官至江浙行省丞相封

太尉知讀書能詩大字學釋溥光小字亦有髣力

普花帖木兒

字兼善蒙古人官至江南行臺御史大

夫憲度著明不屈節死善大字

伯顏不花的斤

字蒼岩高昌國王子而鮮于太常甥

官至江東廉訪副使浙東宣慰使介立不群草書

似其舅氏

康里不花

字普脩也里可温人官至海北廉訪使篤

志墳籍至於百氏數術無不研覽書宗二王

技實

字彥卿凱烈人官至禮部尚書行草宗晉人

榮僧

字子仁回紇人登進士第官至江浙行樞密經

歷楷書師虞永興

朶尔直班

蒙古人官中政院使日嘗奉敕書鄧文肅

神道碑

悟良哈台

蒙古人官至淮南行省平章嘗奉敕書平

徐碑

那海

字德卿蒙古人官至鎮江路鎮守萬戶善大字

郡之扁榜多其所書

喜山字近仁畏吾人官至集賢都事亦工書

篤列圖字敬夫蒙古人登進士第官至監察御史善

大字

隱也那失理字處元畏吾人楷書學虞永興而不熟

內臣張仲壽字希靜號疇齋錢唐人官至翰林學士

承旨行草宗義獻甚有典則亦工大字

管夫人諱道昇字仲姬吳興人趙魏公室封魏國夫

人有才畧聰明過人為詞章作墨竹筆意清絕亦能書仁宗嘗取夫人書合魏公及子雍書善裱為卷軸識以御寶命藏之祕書監曰使後世知我朝有一家夫婦父子皆善書也

劉氏 不知何許人孟運判妻也性巧慧能臨古人字
吐吐逼真

曹氏 號雪齋錢唐民家女居湖曲姿儀秀徹辭對清
華能琴棋書亦可賞

柯氏 天台人九思之女通經史善筆札

天師張與材 字國梁號薇山別號廣微子封正一教
主嗣漢三十八代天師太素凝神廣道明德大真
人金紫光祿大夫留國公居信州龍虎山官至一
品道賢三朝作大字有法草書亦佳

天師張嗣成 號太玄與材子封正一教主嗣漢三十
九代天師太玄輔化體仁應道大真人亦善草書

宗師

吳全節

號閒閒番易人制授特進上卿玄教

宗師

崇文

弘道玄德廣化真人草書亦英拔

真人

丘慶機

字通密號長春登州棲霞縣人詔贈長

春演道主

教真人行草宗黃山谷

真人

薛玄義

字玄卿號上清外史貴溪人行書得體

道士

方從義

字無隅號方壺貴溪人工詩文善古隸

章草

道士

祝玄衍

號丹陽貴溪人能大字

道士

張雨

字伯雨號句曲外史錢唐人博聞多識善

談名理

作詩自成一家字畫亦清逸

道士

鄭樞

字無用號空同生盱江人性稟剛勁尚氣

作古隸初學孫叔敖碑一時稱善後乃流入宋季
陋習無足觀者

道士

趙宜裕

大梁人善古隸

道士

周蘆雪

信州人能篆隸

帝師

巴思八

土波國人法號曰皇天之下一人之上

開教宣文輔治大聖至德普覺真智祐國如意大
寶法王西天佛子大元帝師共三十有八字且夫
有元肇基朔方俗尚簡古刻木為信猶結繩也既
而頗用北庭字書之羊革猶竹簡也及奄有中夏
爰命巴思八采諸梵文創為國字其功豈小補哉
字之母凡四十一

𠃉葛 𠃉渴 𠃉哂 𠃉識 𠃉者 𠃉

𠃉遮 𠃉倪 𠃉怛 𠃉捷 𠃉達 𠃉

𠃉鉢 𠃉發 𠃉末 𠃉麻 𠃉撈 𠃉

𠃉惹 𠃉縛 𠃉若 𠃉薩 𠃉阿 𠃉耶

𠃉囉 𠃉羅 𠃉設 𠃉沙 𠃉訶 𠃉啞

𠃉伊 𠃉鄔 𠃉翳 𠃉汚 𠃉遐 𠃉霞

𠃉法 𠃉惡 𠃉也 𠃉高 𠃉耶 呼

右借漢字釋音並開口呼之漢字母內則去𠃉

𠃉三字而增入𠃉𠃉𠃉𠃉𠃉𠃉𠃉𠃉𠃉𠃉𠃉𠃉𠃉𠃉𠃉𠃉𠃉𠃉𠃉

一母獨成一字或二三母湊成一字如𠃉𠃉𠃉天

地 𠃉人 𠃉東 𠃉西 𠃉南 𠃉北 之類是

也但只一字具平上去三聲而無入聲入聲輕呼則同平聲矣凡詔誥宣敕表牋並以書寫其書右行其字方古嚴重按宋鄭樵七音畧序云七音之韻起自西域流入中夏梵僧欲以其教傳之天下故為此書雖重百譯之遠一字不通之處而音韻可傳華僧從而定之以三十六為之母重濁輕清不失其倫天地萬物之音備於此矣雖鶴唳風聲雞鳴狗吠雷霆驚天蟲蟲過耳皆可譯也況人言乎初得七音韻鑑一唱三歎胡僧有此妙義而儒者未之聞及乎研究制字考證諧聲然後知皇頡史籀之書已具七音之作先儒不得其傳耳據此

則巴思八之制創其所由來遠矣詳具外域天竺
條下

釋溥光

字玄暉號雪菴俗姓李氏大同人特封昭文
館大學士榮祿大夫賜號玄悟大師為詩冲澹粹
美善真行草書尤工大字國朝禁扁皆其所書

釋至溫

字其玉一號全無俗姓郝氏邢州人與太保
劉文貞公少相好同為僧及公為世祖知遇薦至
溫可大用召見將授以官弗受錫號佛國普安大
禪師博記多聞論辨無礙百子諸家之言多所涉
獵善草書得顛素之遺法有草書詩文傳于世

釋可中

字南山天台人真草師晉人甚工

釋祖瑛

字石室吳江人書學趙魏公

釋宗泐

字季潭天台人詩文澹雅隸書亦古拙

釋允

字中岩錢唐人書學趙魏公

釋梵琦

字楚石慶元人工行草有書名

釋大智

字南溟天台人工正書

釋德祥

字麟洲錢唐人書宗晉人

釋來復

字見心番禺人能詩文善筆札

釋克新

字仲銘番禺人能文有雪廬集刻梓以行亦

能古隸

釋靜慧

字古明松江人正書師虞永興甚得其法但

欠清婉耳

釋守仁

字一初富春人能文辭善草書亦能篆隸

李溥圓

字大方號如菴河南芝田人居燕京習頭陀

教能詩於溥光為法弟遂學其書

書史會要卷之七

夏氏元威大有

夏氏元舟中孚

張氏公路宗義

章氏林簡夔

命工刻梓

